

摘藻堂四庫全書薈要

集部

欽定四庫全書薈要

集部

御選明詩卷一百十三

詳校官原任主事_臣李斯咏

欽定四庫全書薈要卷一萬八千六百十三

集部

御選明詩卷一百十三

七言絕句十三

熊開元

穿雲棧

盡日凝雲谷口封
倦還飛鳥亦迷蹤
何如近借齋廚鉢
鞭取耕煙白耳龍

侯玄演



和新柳詞

秦淮雪凇緩春晴十里煙堤綠未明
早是酒旗歌板地隔江風浪卷蕪城

黎遂球

山中

寂寂春眠野夢多酒醒那識夜如何
山中慣不聞雞犬只是天明鳥便歌

陸寶

行嘉善道中夜宿朱涇

春潮覆草半江青
長水分塗客未經
少理蠶絲多織布
百家煙火傍朱涇

齋居二首

層層樓榭枕松關
每到花時獨不閒
酒榼茶罇人去後
牕前一幅米家山

浴蘭初罷振纖絳
桂竹枕桃笙
手自攜
避熱不教人點燭
滿樓涼月照登梯

送人之秦川

水鳥低飛狎榜歌
木蘭雙槳送凌波
浣紗人在中流見
錯認前山作芋蘿

湖上

承恩坊裏綠楊煙
翠幄朱樓大道邊
誰似儂家湖口住
當門人上木蘭船

周應儀

夏日

風荻蕭蕭日欲斜
水村無處不荷花
遙看白鷺忽飛去
占斷柳陰一片沙

夏季風雨大作

急雨斜風百尺樓
樓頭殘暑一時收
而今炎景成蕭瑟
零落荷花十里秋

聞歌

桃花扇底落紛紛
宛轉清歌一曲聞
醉殺文園渴司馬
酒壚斜盼卓文君

陸嘉穎

如皋道中

滿目桑麻雨露稠
白花籬落遶清流
家家魚畧村村酒
絕勝淮南十一州

陳衷脈

過開衡長兄書齋

堤邊煙樹曉陰濃
一片青苔委落紅
粉蝶不嫌春寂寞
紛紛飛過小亭東

王彥泓

吳行紀事

月鐘霜瓦凍鴉啼夢裡楓橋卻向西
暖語未終天忽曉
不堪空作翠鄉迷

燒殘絳蠟啼千樹碎嚼冰蠶攪萬絲
水國不生紅豆子
贈卿何物助相思

燈宵紀事

燈樓月沼映春雲簫鼓風前院
院聞但是酒旗歌板地

一時淒切想離羣

趙李鈿車昔昔遊酒邊燈下共遲留如何月照金堂夜
只有梅花伴莫愁

詠史

冠劍紛紛出石城偏從佳客問分明只應不避蘭成妬
啞啞鶯喉說太清

橫塘

却持離淚下西軒絡緯秋聲玉砌喧行過迴塘更添恨

綠荷猶自蓋雙鴛

為楊子常題文水畫吳中山水二十二首

錄九首

長蕩

柳邊漁艇罾罨歇
洲上人家畧釣斜
落日雁行千片下
蒼蒼未見有蘆花

西虹橋

吳門山水天下無
淡蕩更在城西隅
誰言此橋近闌閨
已是一幅桃源圖

橫塘

縹緲空亭蓋石梁
壓村山色鬱青蒼
煙波一折南流去
便是吳王走狗塘

觀音山

百丈寒泉落寺門
琳宮迢遞桂松深
鶴亭馬石依然在
欲喚清譚支道林

天池

辟含雷雨氣成霞
流下青蓮幾辨花
絕壑樹深鴉噪處

兩間茅屋漢卿家

天平

棟宇都攢蒼壁根湖光萬頃鏡光分
題詩恰憶前年事
茶米雞籠品白雲

三高祠

雪灘古木長橋外煙樹湖光短榻前
蝦菜蓴鱸杞菊薦
可憐風味得同筵

鄧尉山

半山已見太湖全
米因蟲頭出沒邊
長想清秋明月夜
攜筇直上萬峯巔

太湖

煙巒數髻鏡中孤
邊畔檣帆一點無
錯道曲終人不見
包山湖達洞庭湖

秋詞

小屏低榻浣衣家
幾度論心掩碧紗
此日踏歌門外過
墻頭認得刺桐花

月澹花寒曉鏡前
初涼天氣嬾孤眠
秋姿較比春姿艷
試看霜楓似杜鵑

涼月橫窗燭半銷
卧寒清露滴寒蕉
悠揚別夢飄何處
誰托愁魂為一招

寒詞

從來國色玉光寒
晝視常疑月下看
況復此宵兼雪月
白衣裳凭赤闌干

雪壓紅樓照座明
旋添香獸煖銀笙
玉人相顧時時笑

喜聽冰條落砌聲

丁卯首春余辭家薄遊端已首唱驪歌情詞淒
宕征途吟諷依韻和之并寄呈彥仲以志同歎

五首

錄二首

幾夜猖狂別恨侵踏歌相送最情深明朝獨醉黃茆店
更有何人把燭尋

薄倖江南杜牧之花前落魄醉難支阻風中酒誰相伴

賴有韋莊一卷詩

端已詩冊在余行篋中韋莊亦字端已故云見說江湖不歸事阻風中酒

過年年杜牧之詩也却愛紫薇情調逸阻風
中酒過年年韋端已詩也實余目前光景

花下

未必春工一夕移杏花清減夜來姿可知顏色關人處
正在紅消欲白時

春遊絕句

春河曲曲柳絲絲碧草如煙杏滿枝開盡畫船天未午
遊人猶悔上船遲

李世熊

夜泊聞歌

鳴灘扶夢殢殘香
酒醒風聲送月涼
孤影却憐烏匝苦
峯青江白一天霜

黃光昇

懷許受先

玄符綠字細能分
家學須知有說文
此去橋門摹十鼓
籀書難讀益思君

廖孔說

華陽雜詠

林間風靄日氤氲乍露孤峯半未分一夜雷聲在山下
始知身出萬重雲

酒家同彥先何事留春

苦說傷春還餞春夜深啼鳥對沾巾綠陰村酒城南肆
同是尊前白髮人

與一然聽鐘

寥寥相對一燈明數盡遙鐘百八聲題向山堂成故事

他年却好話平生

懷子晝次其韻

花滿揚州月滿櫳相尋最苦夢難同
悶來細把蕪城賦讀向淒淒暮雨中

重過蘭溪

越跡吳蹤久未能飄來一葉泊孤僧
依然白酒青山夜鶯脰湖邊摘野菱

石門

石門酒薄客愁寬
誰念霜溪曉被寒
偶見鄰舟說紅葉
五更疎雨夢長干

偶集

陰雨霏霏濕酒卮
滿堂紅燭對彈碁
主人先醉非無意
愁見更闌客散時

訪道士

露草煙林斷客行
竹扉晝掩對高城
道人不愛人天供
消受秋空鶴一聲

西湖

水中樹影樹中山山自無心水自閒
明月兩堤人不見
小舟獨向斷橋還

田狩龍

蘭溪夜泊

刺船黃帽亂漁燈
載酒孤斟綠似澠
落葉蕭蕭渾不寐
滿溪煙雨憶西興

秋塘

漫天積霧暗新池
蟬送殘聲過別枝
一路荷香飄水殿
滿盤珠落雨來時

林有麟

龍安解組歸舟口號

秋風忽動季鷹思
鱸膾蓴羹正此時
傲骨止應麋鹿伴
松間明月好銜卮

拂衣長謝蜀山雲
漫說當年借寇君
亦有青萍囊底吼
可憐無地斬妖氛

簪組何勞伴我身一瓢萬里未為貧
芙蓉九點秋光好聖世偏容放曠臣

歸來不改舊時門有客時開綠蟻尊
記得雲山多變幻與君深坐細評論

王屋

題黃大癡橫幅山水

絕壁長松倒影低寺門殘日響迴溪
老身意想如曾到八月虞山拂水西

朱鷺

謁采石磯李白祠沽酒不得

先生邀月飲江邊此月年來夜夜懸我念先生對今月
恨無一斗醉祠前

顧猷

秋夜泊謝村

水上人家半掩門寒鴉棲盡欲黃昏孤舟夜泊依紅樹
記得唐人詠謝村

西湖夜別葉環中

水落西陵日已斜
濃煙疎柳半藏鴉
相逢莫漫輕相別
燈火湖頭是酒家

張志遠

集慶寺作

參差紅樹倚晴空
柳栗行吟度晚風
忽憶翠華臨幸處
滿山黃葉寺門東

泛月

煙雨微茫水國秋暮霞飛盡月當樓誰家短笛續長笛
吹墮微霜上客舟

仲夏同仲醇子逸伯承秋潭泛舟城西

兩槳夷猶風幔低湖流清淺荻蘆齊相將迎入煙波去
晚泊竹橋西更西

戈金湯

郊游

雨過青山碧四圍春風輕颺百花飛極知良會非容易

馬上何妨酩酊歸

姚思孝

康山

康山一簣草萋萋無復豪華似潞西
猶有揚州舊時月
翠禽飛上玉梅啼

李奇玉

山居

方花礎潤氣氤氲靜對薰爐
栢子焚夜半雨聲新水漲

枕邊流出一溪雲

顏俊彥

村居雜興

病卧經旬滿面埃
梅花落盡杏花開
畫梁無數空巢在
社雨蕭蕭燕不來

吳麟徵

送葛無奇侍御按粵

刺桐花發粵山青
一路爭看豸繡經
迴雁峯南望天北

五雲長傍使臣星

魏冲

春晚

梅葉初齊梅子勻
新榆穉柳暗通津
春深莫惜餘花盡
却喜黃鸝不露身

陸坦

春夜雪

春雨聲聲入夢闌
暗窗風動曉燈殘
濕雲壓竹烏驚墮

起看空堦一片寒

劉振之

登青笑臺

樓陰倒映水潺潺
簾卷空青鳥乍還
一幅雲林難著筆
半沈半露霧中山

楊廷樞

閨情

寂寞空閨怨夜長
征人何事未還鄉
不知牆外誰家笛

十二樓中盡斷腸

張溥

小斜川

偏於曲徑見垂虹一片疎梅四望同
滴露清晨懷淡漠
石鐘山下起秋風

迴波嶼

潤州兩點合成三謝客風流未是憨
漱澹湖光收拾盡
蘭橈紅板唱江南

周燦

鄰翁邀食五月桃戲作

桃實累累也足豪主人笑飮玉盤高
仙家一熟三千歲
五月先嘗遜我曹

管正傳

西泠橋

斷嶺寒煙落晚鴉
閒聽漁鼓傍橋撾
誰知湖上彎彎月
又照錢塘蘇小家

馬世奇

贈曹元宰守漳州

靈查秋泛海天涼五夜心懸燕寢香
總為至尊憂社稷
漢臣何必薄淮陽

贈鄭少府之任

宦薄無妨吏隱尊清風一拂百年存
流移滿目誰堪繪
念爾監門舊子孫

張明弼

金陵送胡常之歸九華

目極秋江隱碧山
九峯想像有無間
孤舟此去同鳬雁
知宿蘼葭第幾灣

陳宗之

秋山即事

宋朝自召种明逸
漢室何知鄭子真
今日徵君何草草
馬蹄手板拜紅塵

李天植

山中訪宋爾垣

風吹帆影過西城一片浮雲嶺上晴
滿地落紅都不埽
萬松臺畔讀書聲

祝淵

西湖月夜二首

落月鱗鱗水面浮
露華濃滴桂叢秋
不知何處鳴柔櫓
驚起一雙雪色鷗

佛火漁燈漸寂寥
推蓬起坐已中宵
夜來極浦灘聲急

知入西泠第幾橋

傅巖

姑蘇早發

吳閶西去片帆輕
野樹微茫水國平
一夜櫓聲搖月影
不知枕上過孤城

吳本泰

春曉

南來消息斷歸鴻
江國迷春曉夢中
斜帶參星杏花白

依稀牆半宋家東

凌世韶

惠州西湖

湖面寒光一鏡平
露荷煙草入秋清
白鷗浴罷各飛去
遙見潮痕郭外生

朱芾煌

獨步文德橋

畫樓高閣不同登
崔舫鸞笙亦自憎
每日杖藜橋上立

青青雨過看鍾陵

北行江上阻風

荻港黃雲壓水流
風翻白浪打船頭
長年莫道秋江冷
楊柳堤南是酒樓

示從行汪伶

歌行作使得何戡
尚與殷勤佐酒酣
我有傷心千種恨
鷓鴣切莫唱江南

與客飲感舊

檀板牙牌事事新
小車花下自相親
勸君莫惜花前醉
舊醉花前今幾人

雜吟

賽社人稀古廟東
午煙晴裊酒旗風
游人不盡春游興
醉帽欹斜落日中

金毓峒

早春雜詠

繫馬河濱及早春
鳴鳩乳燕往來頻
故園風景知何似

自媿東西南北人

徐之瑞

春游詞四首

西山松柏翠成林十里橫塘水路深
鷗鵝鴛鴦莫相妒
荷花香處結同心

檀槽低攏小鸞青金雁斜飛玉手輕
弟子三吳零落盡
橋頭弦索最知名

山頭擊鼓賽金錢
檣上飛鳥散舞筵
長記迎神送神處

石湖沙背泊郎船

龍膏千炬繞芝楹銀鑰初收玉漏傾夜冷不禁羅袖薄
雙鬢炙火更吹笙

孫嘉績

聞笛

一林寒碧露華浮吹笛誰家客倚樓翦翦西風吹不斷
夜闌翻入小涼州

宮繼蘭

東平道中

長日銷魂去路賒
一鞭殘照見人家
幅巾笑我無頭角
籠盡春風處處花

別徐廣文之任新寧

擁傳鳴騶據上游
神君頌起自夔州
臨歧不是無投贈
知有清風伴去舟

謝泰宗

訪友

西子湖頭二月槎到來剥啄日將斜主人原是孤山鶴
長定花時不在家

蔡道憲

飲同寅周石拙齋偶題其壁

萬字闌干一字無如君對我將長鬚中原別有關心夢
消得瀟湘酒半壺

九月己未不宜聞雷夜忽大震正爾整衿危坐
一雁過簷書示周子聖生

秋聲已老尚聞雷獨雁橫天放膽回只道湘江書易濕
故人風雨夜登臺

梁朝鐘

題畫兼寄友人

灞陵山色動秋風開遍黃花九月中每憶江南帶霜樹
夕陽疎葉渡頭紅

馬嘉楨

訪隱者

樵子相逢不問名
指予山上白雲生
此中新結茅菴在
清磬一聲山鳥鳴

方以智

西湖雜興

露冷芙蓉色不紅
孤山無限老梧桐
當時油壁車前路
猶在西陵風雨中

欸乃漁歌杜若洲
露寒燈火不知愁
朝朝盡醉餘杭酒
厭薄樓船歌舞遊

秦淮漫興

乘舟到處醉來多
溝水東西夜不波
猶是洛陽諸子弟
只今強半解吳歌

聽蘆笙作

誰伴愁人坐月明
笛中兒女舞蘆笙
自言頗似江南曲
不是秋笳出塞聲

朱朝瑛

題畫

釣竿三尺寄浮查
漂泊萍蹤一水涯
日暮可憐紅蓼岸
秋聲一夜繞漁家

來集之

贈吳半壁

養鶴栽松共幾年
故人茅屋萬峯前
只應谷口移雲住
滿洞桃花隔釣船

高承埏

送王瑜仲還維揚

一曲旗亭酒未消離情已逐廣陵潮君歸定倚吹簫侶
明月相思第幾橋

鴛鴦湖

兩湖秋水抱城斜縹緲樓臺帶落霞日暮鴛鴦看不見
數聲風笛起蘆花

中秋詞

芙蓉墜露玉階涼小院銀屏秋夜長一曲清歌人不見
水晶簾外月如霜

過江州

江州風物自妍華
過客停舟只暗嗟
秋暮離腸元易斷
不關紅袖泣琵琶

溪上偶見

畫船風動茜裙低
兩兩紅妝照綠溪
驚起鴛鴦不成夢
一雙飛過藕花西

望盤山作

中盤雲氣下盤生
紫蓋峯高晚獨晴
安得時平解塵組

白松樹底飯黃精

春日聞杜鵑

三月花前叫落暉
四更柳外點征衣
行人一任催歸去
只莫天津橋上飛

單恂

春雨

杏花紅雪覆東牆
玉板初肥若下香
陡憶斷橋清夜燭
瀟瀟暮雨唱吳娘

紅發棠梨花滿枝
小樓寒食雨絲絲
白頭更度傷心節
細簡冬郎蜀紙詩

鄧尉觀梅

擬尋茅屋占山椒
亂後生涯谷口樵
慚媿梅花憐客去
衝寒飛度虎山橋

鄰叟貽芍藥一本

一叢婪尾映窗紗
誰寫徐家沒骨花
好共當階傾鑿落
離人多少尚天涯

有贈

花底相逢記隔春
西窗剪燭夢還真
鵝黃柳色鵝黃酒
莫負池塘月待人

對雨念小園花事

記得停歌醉似泥
木蘭擎月小廊西
玉人泥要新詞唱
蜀紙燈前減字題

有憶

絳河斜落草蟲鳴
簾卷芙蓉夜色清
憶醉銀船涼月底

白家菱角坐吹笙

姚奇脩

遊虎丘

高丘窈窕恣幽探
席展諸天坐蔚藍
聽徹疎鐘歸櫂動
半塘漁火泊城南

徐孚遠

簡朱子若甥

烏衣門巷舊勾留
不過東齋兩度秋
準擬天星湖水發

藉袈橋下穩停舟

陳瑚

訪江子

家住蓮花淺水灣
隨風偶爾到人間
輕舟載得故人酒
趁此月明連夜還

朱一是

經過有感

金粉瓊膏化作灰
美人池館半青苔
只今寂寞斜陽裏

多少東風燕子來

秦溪

秦溪斜日射秋蘋
幾箇閒鷗自作鄰
沙斷柳深漁路狹
野橋西去竟無人

林尊賓

將歸莆陽留別吳江諸子

贈別臨岐折柳枝
越山上瀨片帆遲
荔支亭下清秋月
還憶吳江楓落時

張璠

秋晨

新涼容易到幽棲
晨起輕衫小院西
蟋蟀草根吟未歇
牽牛竹尾一莖低

錢棻

雞冠花

數枝濃豔泛秋光
凝露舒霞玉砌旁
何日秦關驚曉夢
一聲長嘯破秋霜

蘋花

蘆花洲外蓼花西
秋水空香日影低
好似天風吹玉女
霓裳一曲下青谿

無塵自天姥來將返白下

新柳絲絲點落梅
莫愁湖上暮潮迴
春光依舊江鄉好
還向南朝寺裡來

譚貞良

題河梁泣別圖

都尉臺前起朔風
節旄空盡路西東
不知別淚誰先落
同在河梁夕照中

題圯橋授履圖

千金散盡已無餘
圯上蕭條授履初
法吏空煩偶語律
不知黃石解傳書

余增遠

杜子將歸楚賦送

春風春水太無情
有客無家問去程
黃鵠磯頭斜照下

斷腸玉笛武昌城

彭長宜

泊沈家門山

壘門深峭海波平
戍櫓頻傳夜柝聲
欲訴離愁眠未穩
起看殘月趁潮生

陸銓

越行雜詠

蕭山一帶接江潮
迤邐湘湖雉堞遙
恰似西泠煙樹裏

好安十二繞堤橋

嵐光冉冉樹亭亭盡日漁人汎綠汀八月山陰山下路
稻花香軟舞蜻蜓

呂潛

成都雜感

繁華閨閣重詩書賦就朋箋錦不如萬里橋頭凝望眼
枇杷花下更誰居

宮偉鏐

寄懷翦菴禪師

誦經千紙坐雲龕
水鏡光中月一函
別後睡蛇應已出
好牽清夢過淮南

燕地雜感

天雄直北古澶州
千里浮雲入望愁
一自寇萊公去後
暮雲風葉響梧楸

張若義

桃花詞

偶然洞口一花開
不謂漁郎逐浪來
看得等閒儘好住
無端又欲趁潮回

何事重來又問津
人間好景不容尋
武陵果有撈魚者
枉却桃花一片心

酒半聽絃索

鶯聲細轉習家池
鵲操誰彈別恨滋
最是離絃聽不得
看花看到夕陽時

趙庾

野眺

野眺西山水畔行五湖波浪靜無聲
短垣故逗仙人杏啼罷鵲鳩山雨晴

吳易

鄴宮

千騎宮娃簇仗新白櫻桃拂紫綸
年年遺殿花爭發可憶當時馬上人

張家玉

閨思

竹林啼鳥遍春暉
何事行人尚未歸
惆悵夜來牕月白
夢魂飛不到金微

劉曙

水鄉詞

西湖風月好徜徉
門鑰催人不盡觴
此夜闔閭城隔斷
藕隄穿遍過菱塘

乙酉中秋夜農家對月作

橘柚垂垂綠未霜
屋頭徙倚漏清光
廣寒照我愁如海
一半空庭萬里長

眉衡慘淡對疎星
碧海鮫宮想淚零
坐到夜闌惆悵盡
不堪重憶可中亭

葛一龍

野橋懷郭聖僕

白板斜扉曲岸通
朱闌照見綠波中
故人別處猶堪憶
楊柳西邊蓮葉東

寄周公美

溪雲載屋鶯啼晝溪漲浮花柳著綿門外小舟如意去
清齋人起卧茶煙

柬凡夫

石作藩籬樹作鄰家生春菌與秋蓴偶遺書法呼兒子
未定詩篇詣孺人

嚴延甫之楚復留秦淮數日乃別

雪裡看花花裡眠莫愁飛雪到新年愁人只有湘山路

漫入寒蘆苦竹煙

清明

今日還留昨日寒
一年春又客中拚
太湖石畔柴門影
魚呿飛花上釣灘

八月十五盤龍寺

歷歷三年看月愁
燕山楚水白門樓
不知何處明年夜
更憶盤龍寺裡秋

渡石湖

風攪帆陰亂法幢山懸塔影墮吳江白鷗慣聽橫塘曲
來往翻飛自一雙

陳濟生

秋山和貫休韻

秋來祇是入山宜坐到泉聲幽咽時清淚欲零誰許見
峯頭惟有老猿知

朱茂曙

牽牛花

金飈初動露華滋最愛娟娟竹尾垂多少紅樓昏夢裏
不知秋色到疎籬

京口別元孩後登樓作

西樓昨夜露為霜楓葉新紅槲葉黃愁絕江南望江北
雨鈴風鐸正郎當

蔣茂

初夏

水沈煙裊翠參差永晝窺簾燕語遲簇簇桐花飛不已

鷓鴣啼過白蘋池

沈之琰

西湖

微雲澹澹碧天空
叢桂香生細細風
百頃西湖一明月
此身已在廣寒宮

馮鼎位

金陵秋夜有感

露涼尊股耐調羹
不向江東號步兵
縱是山靈文未勒

白鷗應怨負初盟

題畫

萬丈瓊崖蹴碧湖
瑶林寂寂似清都
何人策蹇衝寒到
試向他村覓酒沽

萬峯迴合抱幽居
奇峭爭輸映碧虛
一點紅塵飛不到
開窗時閱化人書

巖嶂重重溪澗縈
緣崖碧樹奏春聲
相攜策杖紅塵外
為訪高樓結隱盟

危峯斜倚碧溪邊
春樹陰陰宿翠煙
一道飛泉雲外落
還和爽籟韻朱絃

閨怨

合歡無伴冷衾裯
池水泔泔易得秋
一樣樓臺花底月
流黃何事獨關愁

沈水初燒未滅香
秋風如水透羅裳
低頭自刺鴛鴦繡
不道湘簾已上霜

八聲詩和夏彞仲韻

錄四首

砧聲

碧鴛瓦上乍凝霜
風送疎砧和漏長
歲歲空教心力盡
此聲傳不到漁陽

櫓聲

松灣一道碧流斜
小艇凌波蹴浪花
欸乃數聲柔櫓過
輕鷗點點起晴沙

蛩聲

泣露寒蛩感客心
勸君莫作苦悲吟
兒童仔細尋聲覓

一入金籠鎖閉深

雪聲

玉塵冉冉灑空庭
松竹傳聲靜夜聽
洛下高人堅卧穩
任教落索打窗櫺

戴重

春燈歌

年年人到長干取
次看燈不忍看
十四樓邊新月夜
銀箏小袖歇春寒

黃翼聖

邨居雜興

廿四番風取次來
梅花落盡杏花開
畫梁無數空巢在
社雨蕭蕭燕未回

休誇紅紫鬪芳菲
開到荼蘼春已非
恥逐游蜂與舞蝶
別尋一徑綠陰歸

閒花無數爛空庭
別有黃金綴決明
一自杜陵矜惜後
秋風秋雨獨關情

胡甲桂

夜泊常山

淙淙灘響上舟遲到面山容未即移更喜月明迎短櫂
吳吟細聽隔船詞

徐時勉

荷亭

輕風不送市塵塵出水芙蓉面面新莫道老年心易足
還思兩槳蕩舟人

林徵材

重過田公園

門巷春深碧草齊
花枝大半委黃泥
林鶯認得尊前客
依舊飛來恰恰啼

李自明

覽輝樓

雨後驚濤響石磯
望中煙樹轉霏微
湘江直北陽臺路
舊日行雲何處飛

張紀

京口懷古


江抱青山鳥勢斜
萬家城郭照殘霞
南朝多少繁華夢
只有當年夜合花

張鹿徵

送葉榮木入閩

野鶴孤蹤道士顏
層林千里入閩關
不知烏石峯頭路
可似江南雨後山

御選明詩卷一百十三



總校官庶吉士臣侍朝

校對官編修臣莫瞻蒙

謄錄監生臣和其聲

欽定四庫全書薈要

集部

御選明詩卷一百十四



詳校官原任主事_臣李斯咏

欽定四庫全書薈要卷一萬八千六百十四

集部

御選明詩卷一百十四

七言絕句十四

馮鼎爵

春游和單狷菴韻

紅板橋頭黃土牆
紫藤千縷寄垂楊
箇中不是凡人境
行到前溪有異香

朝雉驚人掠岸飛
櫻桃初實杏梅肥
落花莫謂無情物

不傍游絲傍釣磯

休唱前人懊儂歌歡時較少恨時多芳菲滿目猶如此
開到荼蘼更若何

欲雨偏晴賴好風又看水脚趁霞紅游人盡逐繁華去
我自鳴橈鷗鷺中

郭金臺

元日新晴漫吟

雪裏梅花綻藥勻初陽又照柳枝新今朝山色青如黛

只合樓頭望蚤春

沈章

隋隄懷古

邗溝新碧晚濤平
楊柳曾遮殿脚行
誰道雷塘歌吹歇
月明重按玉簫聲

天池寺

竊栗猿雛戲法幢
天池中劈石門雙
深山不是無燈火
解惜飛蛾夜觸窓

吳翮

懷熊檠菴師在靈巖

朝衣脫去更脩然
慧業生來即解禪
縱說江南風景好
舊人慵對李龜年

憶王汝成吹笛

夜半清歌遶苑屏
更兼羗笛動人聽
吳郎一去春無主
誰擲新聲入洞庭

朱隗

虎丘春眺

桃花水漲沒桃溪
掩映紅橋碧草齊
萬樹垂楊深雨裏
村南村北鷓鴣啼

佛惠河亭

榕葉蕭蕭下水亭
瓦燈殘燄伴寒星
荒藤苦竹聲相切
却作湘江夜雨聽

西湖偶作

故園籬豆綻涼風
酒薄衣單古寺中
正恐秋聲聽不得

清霜禁殺絡絲蟲

孫淳

倪君益以燈字索詩

畫船前月醉西陵
曾羨新歌續采菱
歸後但逢漁火出
夢中猶認六朝燈

周立勲

首春思歸

新煙舊雨歎沈淪
又過江城十日春
楊柳漸看能贈別

故園芳草未歸人

傷春

平池曲巷古祠東，幾樹桃花落晚風。
明日殷勤樽酒後，春光已過別離中。

白燕墳前載酒過，幾人同唱柳枝歌。
莫愁一夜花如雪，搖落春心自此多。

邢昉

月

偶聽烏啼漏未殘
小池冰合夜深寒
最憐一片霜天月
已是離家十度看

鄒濤

武陵

仙源應不記年華
洞口今開幾樹花
若使重來津可問
扁舟我亦願移家

邵濂

鄰家植荷盆中
高出牆外予于齋頭見之戲題

一絕

露珠濯濯曉光新
紅粉初施彩色勻
憔悴自憐非宋玉
東家何事亦窺臣

吳道約

懷方子恒

王孫別去草萋萋
江麓殘煙送馬蹄
我念故人腸斷絕
小橋流水夕陽西

陸釋麟

集龍門寺期友人不至

欸冬花發又殘冬
鴉陣催寒欲暮鐘
香燼半銷人不到
紙窗梅影一重重

丘遂

江上雜詩

竹筏歸從柳外汀
鷓鴣隊隊晚風腥
漁師不避豆花雨
翻脫蓑衣覆酒瓶

徐爾鉉

春園雜興

徑擬孤山雪合圍
石牀留客每依依
穿林小鳥衝花落
帶得香來繞座飛

項嘉謨

晚次鄉溪

人家遠見女牆頭
客到城邊盡繫舟
薄暮寒蟬聲未歇
心隨楊柳送殘秋

嚴粲

初夏偕顧魏二子游西關

散步西郊任所之雨餘新綠倍濃時同游此日還同散
明日分飛各不知

譚貞竑

南屏歸艇遇雨

望裏南宮潑墨山小窗殘燭放舟還從容畢竟輸漁父
藕葉菱花泊淺灣

姚瀚

秦淮即事

柳岸花溪澹沲天
恁携紅袖放燈船
梨園子弟覘人意
隊隊停歌燕子箋

潘一桂

幽人

山色自滿幽人扉
疎窗晴日淨暉暉
避人一鳥踏枝去
遂有落花無數飛

遙聞姬人作歌

滿溪煙雨白鷗閒
莫莫漁罾占一灣
幾縷清歌雲外出
吳姬分月蕩舟還

鄒斯盛

同陳眉公過西余

東余策杖又西余
石徑深深尚有花
三里青山萬竿竹
斷人家處一人家

華淑

春日雜憶

高樓銀燭夜歡殘一曲琵琶月下彈拍遍絃聲人莫會
自將紅袖障春寒

堤月聽蘇姬樓上理曲

晚粧燈火照樓新重奏妍詞唱未勻遮莫簾空扉已闔
隔牆猶有聽歌人

丁元公

題畫木芙蓉

吹遍鯉魚江岸風露條霜蕊一叢叢謝家池上秋容闊

十里長隄間白紅

陳鴻

鬱林道中

茫茫新水拍沙堤四月應無杜宇啼
記得驛程來日路
五千餘里鬱林西

江必顯

旅思

古樹蕭蕭罨暮雲飛來孤鳥不成羣
月明今夜同誰看

冀北江南我共君

吳騏

和張吳東先生秋圃閒吟

菖蒲蕭艾滿溪濱自起腰鎌付束薪
此日芟夷殊費力從前滋蔓是何人

戲題美人鏡背

輕霞豔雪粉初勻却月涵煙事事新
國色從來本無二何緣復有鏡中人

題布袋和尚像

兜率天宮百寶裝
暫來塵世一空囊
願將世界囊中貯
莫與波旬作戰場

重過熙園

疏圃叅差路欲窮
顏垣碧蘚自春風
白頭重到熙園裏
花木樓臺一夢中

王鎬

九江城外二絕句

錄一首

百花亭畔梅全發
五柳門前草不凋
賈舶分風兩頭去
渡船雙槳一人搖

張宇初

晚立

曉試春衫雨霧中
半亭芳草濕殘紅
杜鵑啼過斜陽去
又是樓頭芍藥風

感舊偶成

故朝臺館勢連空
多在荒煙野水中
愁殺蘆洲風急處

寒笳吹過暮城東

忽雨

依稀煙樹暮鴉風
春事無端怪落紅
白髮相知有誰在
捲簾閒坐雨聲中

三月一日寒食

殘花細雨半鈎簾
過雨溪山牕翠簾
禁火人家春寂寞
鶯啼應未到村南

晚興

晚來山色翠芙蓉樹帶溪聲水接空自是江南春雨久
柳陰啼鳥棟花風

故園自適

過雨啼鶯著意聞晚香欄檻小桃春時光恠殺空歸去
似倩垂楊綰住人

春寒

煙雨聲中酒夢殘蘼蕪添綠又春闌鵲鳩喚處西風急
自是楊花惹暮寒

聞鶯

綠陰垂地曉聞鶯
山雨溪嵐郭外晴
正惱病懷無緒久
遠風吹作送春聲

病懷

曉寒花影罷芳叢
半下疎簾拂面風
病態不關淹酒思
殘春看過雨聲中

南豐舟中

春寒啼鳥怯西風
小艇江波濕霧中
並坐短篷樽酒盡

片帆煙雨到城東

夏景

深院棋聲日正長
博山添火試沈香
道人鞭起龍行雨
帶得東潭水氣涼

冬景

養就還丹不怕寒
獨騎黃鵠上雲端
笑談借得天家雪
散作琪花滿石壇

鄧羽

絕句

人生天地長如客何獨鄉關定是家
爭似山翁隨所寓年年處處看梅花

周思得

夢遊仙詩

雲物蒼茫月正明座中還遇董雙成
玉簫吹罷桃花落猶記霓裳譜上聲

玉扉雙啓爛金鋪樓閣玲瓏湛玉壺
一曲霓裳看未了

又隨白鶴下玄都

翩翩鶴羽拂重雲
仙藥嘈嘈世未聞
一虎借騎何處去
定應月下訪茅君

初晴

天街十二正春陽
小草離離雨後香
吹徹瑤笙人更寂
桃花洞裏月初長

周休休

題院壁

陌上紅塵撲面飛
近來覺得世情微
白雲深處招黃鶴
不識人間有是非

汪麗陽

荅葉東林

柴扉終日對雲關
何事游人興未闌
一榻枕泉眠竹影
茶煙初歇鶴聲殘

絕句二首

幔亭峯下寒雲外
流水飛花送小舸
夜宿山房清不寐

紫簫吹徹月華高

赤壁玄堂水火交
青山旋繞白雲坳
枕琴卧誦黃庭罷
新月釣簾傍鶴巢

吳孺子

飲錢大花樹下

平堤水漫小紅香
醉後風來花滿牀
無奈黃鸝仍勸酒
數聲飛過竹邊牆

晚歸海虞

逆浪捨舟湖水闊
入林跨馬棧橋通
陰厓剩雪一分白
古殿殘陽半壁紅

別周生

庭柯何事報秋聲
江路迢迢幾日程
我去你留俱寂寞
月明他夜最關情

徐淵

書竹溪僧扇

寒玉千竿水一溪
風光絕勝讓東西
僧定起不知午

滿地綠陰沙鳥啼

李廷昱

大報恩寺別張南村

垂柳絲絲挂夕陽
百花春映遶迴塘
他鄉杯酒前朝寺
一曲相看各斷腸

最憶

年年作客不歸家
綠遍平蕪一望賒
最憶竹堂西畔坐
茶煙吹過紫藤花

陳泓

聞笛

塞垣高柳暮
穠倚杖巡簷月已斜
戍古無鄰霜易冷
莫教吹落小梅花

梵琦

燕京二首

高昌王子出京師
手把春風軟柳枝
贈與臨洮遠行客
雲沙漠漠見何時

西山水落甕山浮無數人煙簇上頭好種荷花三十頃
中間更著采蓮舟

宗泐

暑夜

此夜炎蒸不可當開門高樹月蒼蒼天河只在南樓上
不借人間一滴涼

吳松江逢清明

吳松江上看春雨客路扁舟三月行兩岸人家插楊柳

不知今日是清明

送人歸南昌

故人多在大江西
欲寄封書懶不題
昨夜東風吹夢斷
曉來無賴是鶯啼

山水圖

綠水青山茂苑西
荷花開遍越來溪
漁郎蕩漾灣頭去
五月深林謝豹啼

題畫

閒門寂寂掩芳春
坐看梨花帶雨新
鳥自白頭渾不覺
可堪啼向白頭人

秋塘小景

西風昨夜到南塘
楊柳蒹葭色轉蒼
飛鳥獨來荷柄立
不教涼露滿蓮房

來復

次韻王敏文待制燕京雜詠

箕尾垂光地應靈
山來龍朔拱神京
浮風一代興王盛

眼見黃河兩度清

大駕灤陽避暑迴鳳笙龍管內筵開侍臣催進蒲萄酒
雙捧君王萬歲杯

鳳池涼翠滴梧桐白髮祠官侍內宮見說御前催草詔
水精簾映玉屏風

秋滿龍沙草已霜射鵬風急朔雲長內官連日無宣喚
獵取黃羊進尚方

寄神樂觀鄧仲修仙官六首

天上琳宮白玉梯別開方丈五雲西金花傳賜仙官誥
上有乾清御墨題

醺罷星辰校綠章虛壇夜夜降祠光白鸞騎得朝天去
手把芙蓉侍紫皇

開遍溪頭巨勝花雪精雙引紫雲車忽傳青鳥催春宴
爛醉金桃阿母家

紫翠房深敞石屏神仙鍊液漱清泠鍊符催起龍行雨
白日風雷走六丁

自信身閒即是仙金丹何必問長年修真獨許陶弘景
曾著袈裟習夜禪

奉祠曾謁會稽山湖曲天風振珮環一色荷花三百里
洞簫吹月鏡中還

送金貞外歸泉南

朱樓別起擁飛霞浮石橋邊久住家海日浴紅春雨霽
鷓鴣啼上刺桐花

西湖雜詩

芙蓉灣口綠陰斜
吹笛何人隔彩霞
驚起沙頭雙翠羽
銜魚飛上刺桐花

流觴亭子鳳山阿
都護行春小隊過
笑擲金錢花底醉
玉簪彈出白翎歌

題陽關送別圖

三月皇州送珮珂
柳花吹雪滿官河
縱令渭水深千尺
不似陽關別淚多

題黃荃蘆雁圖

稻滿秋田水滿汀黃蘆風急度寒聲太平江海無增綴
不用呼奴夜打更

趙仲穆春山曉思圖

樹色蒼涼曉欲迷石門初入鷓鴣啼桃花不隔秦人路
流出紅雲水漲溪

守仁

題畫

石林霜葉錦欄遍南村北村秋意閒道士莊前一聲笛

放翁艇子出三山

錢舜舉畫黃花翠竹

擬買陶家地一弓
卻看圖畫感秋風
向來翠竹黃花圃
多在空山暮雨中

游白塔寺次伯溫劉先生韻

春草禪扃路欲迷
白頭感慨故宮西
鐘聲送盡寒潮水
月落冬青杜宇啼

題倪元鎮墨竹次鄭德名韻

渭水秋聲動萬竿
小窗新雨一枝寒
坡仙老去風流盡
誰向何山秉燭看

題王冕畫梨花鳥

雙鳥交交語曉晴
東闌花發近清明
梨園弟子傷春去
一夜新愁白髮生

懷友二首

湖草青青上客舟
辛夷花老麥初秋
一春多少懷人夢
半在鄉山雨外樓

送盡梨花雪滿林坐來桐樹綠成陰十年故舊如雲散
一夜春愁似海深

鰕子禪

杖藜何處問鰕禪回首胥村鎖暮煙一曲漁歌秋浦外
腥風吹滿渡頭船

蘆子渡

百里晴沙江水長蘆花風起碧天涼客舟會泊西城下
滿地砧聲兩岸霜

風雨歸莊圖

濕雲漲斷隔溪山
依約茅堂碧樹間
好是鏡湖秋雨裏
陸家莊下載書還

題杜少陵像

關山雲冷笛聲秋
一曲南征感舊游
滿地月明雙鬢雪
斷腸今夜望鄜州

智及

示壽知客

開先寺裏迎賓日禪月堂前索偈時
客路如天春似海
子規啼斷落花枝

良琦

避暑湖光山色樓二首

迴溪斷岸柳陰疎
酒舍漁家竹逕迂
一片湖光暮雲隔
荷花荷葉帶平蕪

重重樓戶燕穿風
曲曲紅橋綠水通
薄暮鈎簾對涼雨
一時秋思在梧桐

口占

柳陰新月上銀盤
入坐清輝落酒寒
莫把閒情聽絡緯
露華已濕玉闌干

玉山亭館以荷淨納涼時為韻得時字

雨浥荷花香滿池
水涵樓閣影參差
舊遊忽憶西湖夢
第一橋頭看月時

懷渭

次孟天暉南山雜詠二首

賀監湖邊草色春
秦淮江上柳條新
山川是處堪行樂
晴日風光思殺人

暮春三月風日妍
亂折花枝送酒船
西嶺山光青浸水
南池柳色綠生煙

德祥

天平圭禪師書至賦詩答之

西山鸞鶴少因緣
只向天平住一年
無限別來惆悵事
紫藤花落寺門前

題劉松年桃花山水小幅

杳無雞犬有人家
夾水山高路不賒
劉阮別來頻甲子
年年春雨送桃花

遊西洞庭

玉柱金庭在洞中
當時誰道有毛公
人間白髮三千丈
只見桃花一片紅

聞芷

白芷花開繞屋香
一時秋思入江鄉
雲多水闊人難見

楚竹歌聲動夕陽

春江送僧圖為芳上人題

喚得春船柳岸頭
欲行猶更話綢繆
水雲蹤跡明朝夜
又聽鐘聲那寺樓

中秋奉懷幻隱禪師

秋正平分月正圓
峯前桂子落亭前
老禪方丈寥寥夜
不聽猿聲二十年

聞笛

江花如雪繞江春
江水迢迢入夢頻
一夜東風有羌笛
滿城都是惜花人

秋曙

二十五聲秋點殘
露華偏濕早窗寒
朧明西月簷牙上
猶照梧桐落井闌

題明辯之畫春江聽雨圖

歸來雙髻各蕭然
見畫猶能記昔年
風雨一船曾泊處
借人燈火草堂前

題蘿壁山房

青蘿壁下一僧房
長日唯燒一炷香
風在竹欄人在定
鳥銜紅柿落柴牀

次韻福無受過橫塘塔

短籬依舊逐溪開
小竹從新繞塔栽
燕子歸來春已去
藤花落盡水縈迴

題一雁圖

萬里江湖一葉身
來時逢雪又逢春
天南地北年年客

只有蘆花似故人

題春山雨霽圖

絲絲暖雨歇春朝
雲壓紅流落澗橋
欲覓桃花無路入
却聞風度玉人簫

題僊山樓觀

複水重山路杳然
仙家樓觀入青天
那知白首黃塵事
只伴桃花度歲年

寄洪時齋

草上東風柳上煙
溪頭三日嫩晴天
竹雞叫斷春泥滑
閒與梅花說舊年

送馬仲禎之潁川

別離依舊柳重新
揚子江頭白髮人
一月路程千里夢
客中消却幾分春

題畫八首

鸚鵡多情語曉風
惱他枝上白頭公
分明一段江南思
煙雨樓臺似夢中

亂山深處白鷗洲
不見漁郎問隱流
春屋醉聽三日雨
桃花落盡水悠悠

接藍春水暖初流
擘絮晴雲濕未收
相約杖藜同步出
有詩多在小橋頭

碧柳絲絲拂釣舟
溶溶水面一羣鷗
不知誰在茅堂住
坐看青山到白頭

江亭湖寺兩蕭然
畫裏題名二十年
幾樹夕陽流水外
斷風殘雨曳鳴蟬

陰森羣樹濕秋光
橋下溪流接草堂
聞有客來先出候
黃花村路酒吹香

仙山曾謁大茅君
橋裏桃花兩路分
不道樓臺風雨上
又聞雞犬隔春雲

碧水前頭樹一林
留雲僧屋住來深
泊舟橋下青苔岸
不得桃花不可尋

題畫紅梅

三百年來處士家
酒旗風裏一枝斜
斷橋荒蘚無人問

顏色而今似杏花

為順首座題畫

長憶春江雨後山
看雲如入畫圖間
何人肯袖漁竿手
閒却扁舟在水灣

題網魚圖

溪頭三月雨昏昏
落盡桃花水正渾
網得魚多滿家喜
賣時應不到城門

妙聲

表上人梅

夢入梨雲路不分
幽香多在定中聞
起來寫得橫窗影
寄與山中滿谷雲

至仁

送興祖庭遊會稽

故人別我向何處
歲晏扁舟泛若耶
萬壑千巖風雪後
杖藜隨處看梅花

題秋色歸舟圖

滿目烽煙萬國秋江山何處可追遊吳淞水落鱸魚美
風雨歸來一釣舟

次韻寄唐伯剛斷事

野水芙蓉繞鶴汀畫橋楊柳挂魚罾秋風攜手青溪曲
竹杖荷衣一箇僧

清澹

西湖曉行

海角曠曠日欲生山南山北淡煙橫春風吹斷沙禽夢

人在綠楊堤上行

無愠

次韻題高齋

高齋寂寂俯清池
瓦鼎香浮十二時
天曉定回松下石
蘚痕青上布伽黎

惟則

榆城聽角

十年游子在天涯
一夜秋風又憶家
恨殺葉榆城上角

曉來吹入小梅花

山居四景 錄二首

林軒飛翠隔黃塵
瑤草吹香別是春
一卷楞伽消白晝
從教啼鳥喚游人

茶罷焚香獨坐時
金蓮水滴漏聲遲
夜深欲睡問童子
月上梅花第幾枝

弘道

天竺雜詠二首

南澗飛淙雜雨鳴
顛風老樹作秋聲
庭前攪碎芭蕉葉
添得書窗兩眼明

老樹枯藤蔓草纏
蕭蕭獨立傲風煙
澗池飛下如拳石
知有山靈護冷泉

似杞

題朱元暉山水小景贈陳原貞別

江頭雨足春水生
江上青山煙樹暮
扁舟明發去如飛
目斷征帆入蒼霧

道衍

送昂上人遊洞庭諸山

西風飛錫度如舟
來向湖山作勝遊
七十二峯青一色
君看何處獨宜秋

題薛澹園墨竹

澹澹煙中映夕曛
疎疎石上拂晴雲
展圖却憶西岡夜
坐聽秋聲亦有君

題幻住山居圖

萬疊青山萬疊雲
亂山流處路微分
嶺猿悽斷人愁聽
只隔煙蘿便不聞

秋蝶

粉態凋殘抱恨長
此心應是怯淒涼
如何不管身憔悴
猶戀黃花雨後香

與咲軒晚過穎山精舍

偶同禪友到林中
竹院深深小徑通
斜日在山人散後
亂蟬踈柳自秋風

徐園看花已落

自咲尋花獨後期
殘紅粘砌綠縈枝
尋常日對猶多恨
況是斜風暮雨時

溥洽

次韻王起東夜宿琵琶洲

倚棹寒江照白頭
看山不盡且遲留
無人為寫琵琶恨
自撥鴟絃過小洲

懷瑾

江行分韻

南徐百里近邦畿
水滿春江一棹歸
回首金焦在何許
落霞紅處白鷗飛

普慈

頌古詩

雨霽長空蕩滌清
遠山初出未知名
夜來江上如鉤月
時有驚魚擲浪聲

掘溝引水澆蔬圃
插竹為籬護藥苗
楊柳如絲風易亂

梅花似雪日難消

寶明

次沈陶菴題石田有竹莊韻

東林煙月舊松蘿無復君來對酒歌
千葉芭蕉萬竿竹相思一夜雨聲多

戲題

拆了鞦韆院宇空絲絲楊柳自春風
薔薇不為人拘束却過鄰家屋上紅

恩鏤

送張逸人

棟子花開香雨晴
乍逢還別若為情
不知流水將人意
送過南沙第幾程

明秀

過孫山人故居

溪邊野竹映寒沙
茆屋青山處士家
燕子歸來寒食雨
春風開遍野棠花

遣興

白雲流水度虛屏
小坐池邊眼自醒
春事不知渾入夏
青蟲無力隨槐庭

晉泰

過牛頭寺

行過多歧又問歧
雲林深處到來遲
寺僧相見不相語
自對斜陽讀斷碑

寄廣川準無則

白雲紅樹對離情
秋意微茫畫不成
吟就新詩書落葉
憑風吹過德州城

永瑛

題院壁

自愛青山常住家
銅瓶閒煮壑源茶
春深白日巖扉靜
坐看蛛絲罥落花

柳塘

千樹垂絲兩岸煙
綠波春雨白鷗天
江鄉不近章臺路

留得長條繫釣船

宿夢石房

坐久青燈結暈紅
紙窗寒逗落花風
西齋試與吟春草
夜半開門月正中

文湛

題月堂精舍

雨後青苔路不分
柴門竹裏映斜曛
松花落盡無人到
只有山童埽白雲

題畫芙蓉

江邊誰種木芙蓉
寂寞芳姿照水紅
莫恠秋來更多怨
年年不得見春風

題畫

渡口漁家對碧峯
柴門半掩落花風
釣船日暮不歸去
只在江南細雨中

古淵

題松雪山水

雪後潮痕上釣磯
江南天水一絲微
萋萋芳草迷禾黍
何事王孫尚不歸

方澤

寄西洲

楓落吳江雁影斜
燕臺客子未還家
可能別有春風在
消得秋霜兩鬢華

溪莊即事

寒逼西堂布被重
江頭楓葉想應紅
天明自起看霜色

不在江頭在鏡中

法聚

立玉亭

山當崖斷孤亭立竹樹迴環翠萬層
倒看夕陽深澗底不知雲外有歸僧

明周

送人還壺關

林花未吐怯輕寒人在天涯送客還
千里好山迎馬首

白雲飛處是壺關

鎮澄

不二樓

談經人在翠微中
縹緲煙霏隔幾重
欲寄此心無可托
長隨片月挂西峯

戒襄

曉過橫塘

半幅蒲帆九里汀
石湖秋水接天青
舟人指點蘼蕪外

一帶遙山是洞庭

果斌

王十嶽金平淵山寮避暑

小隱空山絕四鄰
野雲孤鶴自相親
誰知一逕深如許
猶有敲門看竹人

洪恩

祇樹菴三首

竹映窗前水漱門
數聲幽鳥報朝昏
行來恐踏苔痕破

目送山雲過遠村

新植寒梅匝杏開
徧尋蘭蕙繞離栽
香風吹落梨花雪
蜂蝶紛紛間錯來

山氣籠篴曉出雲
一溪流水望中分
巖花樹樹紅相映
竹裏橫拖白練裙

德清

舟次橫浦

五雲一水入南安
萬疊山迴六六灘
行到水窮山盡處

梅花無數嶺頭看

山居四首

萬峯深處獨跏趺
歷歷虛明一念孤
身似寒空挂明月
唯餘清影落江湖

平湖秋水浸寒空
古木霜飛落葉紅
石徑小橋人跡斷
一菴深鎖白雲中

雪擁柴扉獨坐時
寒林寸寸折瓊枝
曉來頓失青山色
開盡梅花總不知

寒燈獨照影微微
疎屋風吹雪滿衣
忽憶五臺趺坐處
萬年冰裏一柴扉

真可

楞嚴廢寺

萬花叢裏畫樓新
玉女凭欄天上春
明月一輪簾外冷
夜深曾照坐禪人

吳氏廢園

汾陽門第晉風流
縹渺湖山感勝遊
今日松蘿誰是主

斷雲殘月鎖江樓

傳慧

寄王百谷

惠山泉水虎丘茶
相去柴門路不賒
經歲故人書斷絕
夕陽林外即天涯

湖上雜詠二首

草色連雲暗水陂
掠芹乳燕影差池
游絲似惜春光盡
密甯殘花挂竹枝

湖水無風似鏡清
湖船日日送人行
垂楊浪許關離別
有限長條無限情

法果

山居詩

天中明月照蘆扉
溪上涼風生葛衣
倚樹呼猿向溪立
紛紛松葉杖頭飛

茅菴總是白雲封
猶想當門樹幾重
除却牀前三尺地
鑿開春霧盡栽松

桑樞甕牖我何嫌三尺繩牀近草簷今日夢回秋色裏
白雲紅樹滿疎簾

雞林幾日是西風處處蕭蕭樹樹紅山色最宜秋日裏
溪聲況在月明中

通潤

山行

閒花歷歷鳥關關盤過斜溪更入山身到孤峯心亦住
却嫌流水出人間


慧浸

望丹陽

曲岸平川駕小航
秋雲堆裏出重岡
遙看天影蒼茫處
孤城倚夕陽



御選明詩卷一百十四



總校官庶吉士臣侍朝

校對官編修臣莫瞻菴

謄錄監生臣和其聲